

Dielangana dia Meji pa Lumu Luimpe lua Yone

No. 31

Badi bashipa Yesu ku mutshi mutshiamakane

Badi babueja Yesu tshifulu tshia meba ku mutu

Pashishe Pilato wakangata Yesu, wakamukuma. Masalayi akaluka tshifulu tshia bukelenge tshia meba akamubueja ku mutu, akamuluatshisha tshikowelu tshikunze; akalua kudiye, akamuambila ne, Muoyo, Mukelenge wa Bena Yuda. Akamukuma. Pilato wakalupuka, wakalua kudibo kabidi, wakabambila ne, Tangilayi nakulua nandi kunudi bua nuenu numanye ne, Tshiena mumusangane ne dipila (Yone 19:1-4).

Pilato wakamanya ne, Yesu udi kayi ne bualu, kadi wakamukuma. Pilato wakitabuja masalayi andi bua kuluka tshifulu tshia bukelenge tshia meba ne kuluatshisha Yesu ne tshikowelu tshikunze bua kumuseka. Mu dinanga bua Tatu wende, Yesu, bu Muena Mudimu wende wa kueyemena, wakakankamana pakakengeye ku bianza bia bena lukuna bandi. Mu dinanga bua ba pa buloba yeye wakakenga bua bualu buetu. “Bakamutapa mputa bua mibi yetu, bakamukuma bua malu mabi etu; dikenga didi divuija ditalala dietu diakadi pambidi pandi, ne tuakukoleshibua ku mibundabunda yandi” (Yeshaya 53:5). Dinanga dia Yesu didi dinene be.

Pilato udi ufila Yesu mu bianza bia Bena Yuda

Dilongolola dia Kupita kua Yehowa diakafika, diba diakadi bu munda munya. Yeye wakambila Bena Yuda ne, Monayi Mukelenge wenu! Bakela meyi abo bikole ne, Umumushe, umumushe, umushipe ku mutshi mutshiamakane! Pilato wakabakonka ne, Nshipe Mukelenge wenu, anyi? Bakuidi banene bakamukudimuna ne, Katuena ne mukelenge mukuabo, anu Kaisa. Pashishe yeye wakamufila mu bianza biabo bua kumushipabo ku mutshi mutshiamakane (Yone 19:14-16).

Bakuidi banene bakamba ne, Katuena ne mukelenge mukuabo, anu Kaisa, mukelenge wa Bena Lomo. Kunyima kua bidimu bikuabo Bena Lomo bakabutula Yelushalema ne ntempelo. Bena Yuda kabayi ne ntempelo too ne lelu.

Badi bakumina Yesu milonda ku mutshi mutshiamakane

“Bakangata Yesu; yeye wakalupuka mudituadile mutshi wandi mutshiamakane, wakaya ku muaba udibo babikila ne, Muaba wa Kabalubalu ka Mutu, mu Buena Yuda ne, Gologota. Bakamukuminaku milonda mu bianza ne ku makasa ku mutshi mutshiamakane, bakenzela bakuabo babidi muomumue, mukuabo eku, munga eku, Yesu pankatshi. Pilato wakafunda mukanda, wakauteka ku mutshi mutshiamakane. Wakafunda ne: YESU WA MU NAZALETA, MUKELENGE WA BENA YUDA” (Yone 19:17-19).

“Kadi bakuidi banene ba Bena Yuda bakambila Pilato ne, Kufundi ne, Mukelenge wa Bena Yuda; ufunde ne, Yeye wakamba ne, Ndi Mukelenge wa Bena Yuda. Pilato wakabambila ne, Nakufunda munakufunda” (Yone 19:21,22).

Masalayi, pakamukuminawu milonda mu bianza ne ku makasa ku mutshi mutshiamakane, akangata bilulu biandi akabanyangana anayi, disalayi biadi, disalayi biadi; ne tshikowelu tshiandi kabidi, kadi tshikowelu katshiakadi ne mitelu, tshiakadi tshikuma tshijima kulu too ne panshi. Bakambilangana ne, Katutshipandi, tutshielele nshobo ne tshikala tshia nganyi; nunku bakajikija diyi diakafundabo mu Mukanda wa Nzambi ne, Bakabanyangana bilulu bianyi, bakelela tshikowelu tshianyi nshobo (Yone 19:23,24. Musambu 22:18).

Mufundi wa Musambu 22, mulombolodibua kudi Nyuma Muimpe, wakafunda bualu bua makenga a Mukelenge wetu ne, “Bukole buanyi buakuuma bu tshiyoyi tshia luesu, ne ludimi luanyi ludi lulamata tshilakalaka tshianyi. Wewe udi undadika mu dinfuenkenya dia lufu. Bualu bua mbua yakunnyunguluka, tshisumbu tshia benji ba malu mabi tshidi tshingela munkatshi; bakuntapa mputa misompoke mu bianza ne mu makasa” (Musambu 22:15-16).

Yesu udi ufila mamuende Malia mu bianza bia Yone

Kadi mamu wandi, ne muanabo ne mamu wandi mukaji, ne Malia mukaji wa Kelopa, ne Malia wa ku Magadala, bakadi bimane pepi ne mutshi mutshiamakane wa Yesu. Pakamona Yesu mamu wandi ne muyidi wakadiye musue muimane pabuipi, wakambila mamu wandi ne, Mukaji, muanebe kayawu. Wakambila muyidi ne, Mamu webe kayawu. Pa diba adi mene muyidi awu wakaya nandi ku nzubu kuandi (Yone 19:25-27).

Pakadi Yesu mukenga pa mutshi mutshiamakane yeye wakadi wela meji bua bakuabo, bua mamuende, bua muivi pa mutshi mutshiamakane pepi nandi, ne bualu bua bena lukuna bandi. Yesu wakamba ne, “Tatu, ubabuikidile bubi buabo, kabena bamanye bualu budibo benza” (Luku 23:34).

Bakaji banayi bakadi bimana pepi ne mutshi mutshiamakane wa Mukelenge wetu ne Yone. Bakaji aba bakaleja kulamata kuabo kudi Yesu ne dinanga diabo dinene bua Musungidi wabo. Kabakatshina masalayi a Bena Loma anyi tshisumbu tshia bena lukuna ba Yesu. Kabakatshina bena tuseku. Bakadi bayemenyibua ne ditabuja diakapita ditabuja dia balume bakadi bayidi ba bungi bunene.

Bualu buakajika

Pashishe Yesu wakamanya ne, Malu onso akujika; bualu bua kujikija diyi diakadi difunda mu Mukanda wa Nzambi, yeye wakamba biandi ne, Ndi ne nyota. Dilonga diakadipu diule tente ne nvinega; bakateka musukulampampa muusha tente ne nvinega ku mutshi wa hisopa, bakauteka ku mishiku yandi. Pakangateye nvinega, wakamba ne, Bualu buakujika; wakinyika mutu, wakapuola muoyo (Yone 19:28-30).

Disalayi didi dimutua difuma mu lubadi

Dituku adi diakadi dia Dilongolola; bualu bua bitalu kabishadi ku mitshi mitshiamakane dia Lumingu (Lumingu alu luakadi dituku dinene), Bena Yuda bakalomba Pilato bua kubitshibulabo bibelu ne kubiumusha. Masalayi akalua, akutshibula bibelu bia wa kumudilu, ne bia mukuabo wakabashipabo nandi ku mutshi mutshiamakane; kadi pakalawu kudi Yesu, akamusangana mumane kufua, kaakatshibula bibelu biandi. Kadi dinga disalayi diakamutua difuma mu lubadi, mashi ne mayi biakapatuka. Wakatangila bualu abu nguakabuamba, diyi diandi ndilelela; udi mumanye biandi ne, Diyi dianyi ndilelela, bua nuenu kabidi nuitabuje (Yone 19:31-35).

Mukanda wa Nzambi udi wamba ne, “Bikalaku kakuyi kumatshisha kua mashi panshi, kakuena kubuikidila kua mibi nansha” (Ebelu 9:22).

Petelo wakafunda ne, “Bualu bua nudi bamanye ne, Tuakapikudibua, kenku bintu bijimina, ku argent anyi ku ngolo, mu malu a patupu a muoyo wenu akanushilabo kudi batatuenu; kadi nuakapikudibua ku mashi a mushinga mukole, bu a muana wa mukoko kayi ne tshilema ne kayi ne ditoba, ku mashi a Kilisto mene” (1 Petelo 1:18,19).

Kumatshisha kua mashi a Yesu panshi kudi kutuambila bualu bua muoyo wende mutekibua panshi. Yesu wakafua bua muntu yonso udi umuitabuja newikale ne muoyo wa tshiendelele. Mukenji munene wa Yesu diambedi yeye kayi muanze kuangatshibua mu

diulu wakadi ne, “Bakafunda ne, Mbimpe bia Kilisto kukengeye ne kubikeye ku lufu papita matuku asatu; mbimpe kabidi bia kuambilabo bisamba bionso bualu bua kukudimuna kua mitshima ne bua kujimijibua kua mibi yabo mu dina diandi, babangile ku Yelushalema” (Luka 24:47).

***“Bualu bua Nzambi wakatamba kusua ba pa buloba,
yeye wakabapa Muanandi umuepele mulela
bua muntu yonso wamuitabuja kafu biandi,
kadi ikale ne muoyo wa tshiendelele”
(Yone 3:16).***